

中國邊疆叢書第二輯

許容等監修

甘肅通志

(五)

文海出版社印行

甘肅通志卷之三十四

人物

兩河郡邑山川雄峻土厚水深聞氣所鍾篤生英俊
代不乏人載在史冊按籍可稽父老傳聞輿論可採
或政績文章或武功事業其所建樹雖有不同皆爲
人傑

本朝名臣接武節著封疆勲銘鐘鼎人才之盛度越前
代尤當紀載流芳奕禩志人物

蘭州府

漢辛慶忌字子貞狄道人酒泉太守武賢子少以父任
爲右校丞隨長羅侯常惠屯田烏孫赤谷城與歙侯
戰陷陳卻敵惠奏其功拜爲侍郎遷校尉將吏士屯
焉耆國還爲謁者尙未知名元帝初補金城長史舉
茂才遷郎中車騎將軍朝廷多重之者遷張掖太守
徙酒泉所在著名成帝初徵爲光祿大夫遷左曹中
郎至執金吾大將軍王鳳薦其通於兵事明略威重
任國柱石廼復徵爲光祿大夫執金吾後坐小法左
遷雲中太守丞相司直何武上封事謂慶忌宜在爪

牙官以備不虞尋拜爲左將軍時朱雲欲請上方斬馬劍斬佞臣張禹頭上怒下雲將戮之慶忌叩頭流血爭之得免慶忌居處恭儉食飲被服尤節約爲國虎臣遭世承平西域親附敬其威信年老卒官長子通爲護羌校尉中子遵函谷關都尉少子茂水衡都尉出爲郡守皆有將帥之風宗族支屬至二千石者十餘人

魏辛 毗字佐治其先自隴西徙陽翟毗隨兄評從袁紹魏王曹操爲司空辟毗毗不得已應命表毗爲議

郎遣毗平下辨還爲丞相長史文帝踐祚遷侍中帝
欲徙冀州萬戶實河南毗諫帝不答起入內毗引帝
裾帝奮衣不還良久乃出曰佐治卿何持我太急耶
乃徙其半帝以射雉爲樂毗諷之亦爲希出帝大舉
征吳毗止之帝不從卒無功劉放孫資用事而毗不
與往來子儆諫之毗正色曰吾之立身自有本末孫
劉不過令我不作三公而已焉有大丈夫欲爲公而
毀其高節者耶終衛尉諡肅侯

晉李

含字世容隴西狄道人舉孝廉會州刺史郭奕

素聞其賢擢含爲別駕遂處羣僚之右尋轉秦國郎中令領始平中正後河間王融表爲征西司馬甚見信任終河南尹

辛 謚字叔重狄道人少有志尚博學善屬文性恬靜不妄交遊召拜太子令諸王文學累徵不起永嘉末以謚兼散騎常侍撫慰關中謚以洛陽將敗故應之及長安陷沒劉石辟命並不應處喪亂之中頽然高邁視名利蔑如也及冉閔僭號復備禮徵謚遺閔書勸其歸身本朝因不食而卒

辛 勉字伯力狄道人父洪左衛將軍勉博學有貞
固之操懷帝累遷爲侍中及洛陽陷隨帝至平陽劉
聰欲署爲光祿大夫勉固辭不受聰遣其侍郎喬度
齎藥酒逼之勉曰大丈夫豈以數年之命而虧高節
事二姓哉引藥將飲度遽止之曰相試耳君真高士
也嘆息而去聰嘉其節爲築室於平陽西山月致酒
米勉亦辭而不受年八十卒

李 暠字大業狄道人性沉毅寡和美器度通涉經
史習知孫吳兵法後爲燉煌太守及段業僭稱王六

郡推蜀爲大都督大將軍涼公領秦涼二州牧遣使
間行奉表詣闕國人諡曰武昭王

魏辛紹先狄道人父淵以義烈見稱西土紹先性明敏
有識量才勇丁父憂三年口不甘味頭不櫛沐髮遂
落盡自中書博士轉神部令遷下邳太守爲政不尚
苛察舉其大綱惟教人爲畜牧禦敵之備及宋將蕭
順之等來侵畏紹先不歷郡境而去卒贈并州刺史
諡曰惠

辛子馥字元穎平原相穆之子早有孝行累遷平原

相父子並爲此郡吏民懷安之元顥入洛子馥不從
莊帝反正封三門縣男天平中除太尉府司馬白山
連接三齊瑕邱數州之界多有盜賊子馥授使檢覆
因辨山谷要害宜立鎮戍之所又諸州豪右在山鼓
鑄奸黨多依之又得密造兵仗上表請罷諸冶朝廷
善而從之後卒於清河太守

辛 琛字僧貴狄道人雄之族祖祖敬宗父樹寶並
代郡太守琛少孤曾過友人見其父母無恙垂涕久
之後魏孝文時釋褐奉朝請榮陽郡丞太守元麗性

願使酒琛每諫之麗後醉輒令閉閣曰勿使丞入也
孝文南征麗從輿駕詔琛曰委卿郡事如太守也景
明中爲揚州征南府長史刺史李崇多事產業琛每
評折後加龍驤將軍南梁太守崇因置酒謂琛曰長
史後必爲刺史但不知得上佐何如人耳琛對曰若
萬一叨忝得一方正長史朝夕聞過是所願也崇有
慚色琛寬雅有度量涉獵經史喜怒不形於色當官
奉法所在有稱卒於官

辛術字懷哲狄道人南梁太守琛之子爲清河太

守政有能名累遷散騎常侍魏武帝六年侯景叛術破之擒蕭淵明遷淮南經畧使天保元年侯景徵江西租術渡淮燒其稻數百萬頃還鎮下邳人隨北渡淮者三千餘家又奉文宣勅凡刺史太守鎮將犯法者術皆案奏殺之有犯法者朝廷以其奴婢百口及貲財盡賜術三辭不見許乃送詣所司不復以聞及王僧辯破侯景術招攜安撫城鎮相繼款附於是移鎮廣陵獲傳國璽送鄴尋領太常卿議定律令遷吏部尚書銓衡黜陟咸宜甚爲當時稱譽術清儉寡欲

勤於所職臨軍以嚴牧民以惠少愛文史晚更勤學
雖在戎旅手不釋卷

辛 雄字世賓狄道人有孝性居父憂哀毀異形殆
不可識廉謹樸素不妄交喜怒不形於色清河王懌
爲司空辟爲戶曹參軍懌遷司徒仍授戶曹參軍並
當繁劇諍訟填委雄用心平直加以嫺明政事經其
斷割莫不悅服懌重之詔令門下尚書廷尉議獄雄
議曰春秋之義不幸而失寧僭不濫僭則失罪人濫
乃害善人詔從雄議於是公能之名甚盛又爲祿養

論書奏肅宗納之以雄長於世務更除司空長史詔
雄爲行臺左丞與臨淮王彧擊賊平之在軍上疏請
明賞罰除輔國將軍尙書右丞遷光祿大夫莊帝除
度支尙書兼侍中關西慰勞使將發請事五條帝從
之

李琰之字景珍狄道人少有盛名彭城王勰辟爲行
臺參軍累遷國子祭酒孝莊初討葛榮以琰之兼御
史中尉爲北道軍司馬歷車騎將軍雍州刺史琰之
素機警善談經史百家無所不覽朝廷疑事多所訪

質當時人士咸宗之

李延實狄道人性溫良襲父爵爲清泉縣侯莊帝以
元舅之尊超授侍中太保封濮陽郡王延實以太保
犯祖諱又以王爵非庶姓所宜抗表固辭徙封濮陽
郡公諡孝懿

梁 覽字景胤金城人其先出自安定太祖時祖顯
爲尙書封南涼公父釗爲河華二州刺史封新陽伯
至覽家世豪富貲累千金魏明帝孝昌初秦州莫折
念生胡琛等反散財召募有三千人鎮河州從大軍

平之歷涼河二州刺史封安德縣侯覽旣爲本州刺史盛修甲仗人馬精銳吐谷渾憚不敢出曰梁公在未可行也永安中詔策授世爲河州刺史封郡公

趙柔字元順金城人少以德行才學知名河右沮渠牧犍時爲金部郎太武平涼州內從京師歷著作郎河內太守甚有信惠

宗欽字景若金城人少好學有儒者風仕沮渠蒙遜爲中書郎庶子洗馬上東宮侍臣箴太武平涼州入魏賜爵卧樹男拜著作郎高允甚相褒美有蒙遜

記十卷

念 賢字蓋盧金城抱罕人美容質頗涉經史少時
有善相者過諸生競詣之賢笑曰男兒死生富貴皆
前定何用相爲居父喪哀毀以孝稱後以軍功封屯
留縣伯從爾朱榮入洛兼尙書右僕射大統中官至
都督秦河二州刺史子華性和厚有長者風官至開
府儀同三司河州刺史

周辛慶之字餘慶狄道人父顯宗馮翊郡守慶之少以
文學徵詣洛陽對策第一除秘書郎魏孝莊時楊津